

興國縣志卷之四十六

雜記

上洛山有木客形似人語亦似人遙見分明近則藏隱
自言秦時造阿房宮採木者食木實得不死能斫杉枋
與人交市易人刀斧交關者置物枋下却走避之木客
尋來取物下枋與人隨物多少甚信直不欺有死者亦
哭泣殯葬嘗有山人行遇其葬日出酒食啖人山有石
墨可書十道四番志
山都形似崑崙奴通身生毛見人輒閉目張口如笑好
在深澗中翻石覓鱉噉之嘗就民間飲酒賦詩云酒盡

興國縣志

卷四十六

雜記

一

君莫沽壺傾我當發城市多囂塵還山弄明月

鄧德明南康記

夔為一足之怪家語所謂山之怪夔罔兩王肅云夔罔
兩似夔而非夔也夔亦一足罔兩字一作魍魎唐小說
有一足叟自稱太上隱者作詩云云東坡詩云山中木

客解吟詩即此

楊升菴集

元嘉中南康平固人黃苗為州吏受假違期行經宮亭
湖入廟願希免罰坐又欲還家若並遂當上猪酒苗至
州皆得如志還遂不過廟行至都界與同侶並泊中夜
船忽自下其疾如風夜四更至宮亭始醒悟有烏衣三
人持繩收縛苗詣廟階下見神年可四十披錦袍梁下

懸一珠

一人白平固黃苗上願猪酒

遜回家教錄今到命謫三年取三十人遣吏送苗山林中鑱腰繫樹日以生肉食之忽忽憂思但覺寒熱舉體生斑毛爪牙牲欲搏噬吏解鑱放之隨其行止三年凡得二十九人次應取新淦一女而此女士族初不出外後值與姊妹從後門出詣親家因取之涉五年人數乃充神教放遣以鹽飯飲之體毛稍落鬚髮悉出爪牙墮生新者經十五日還如人形意慮復常送出大路縣令呼苗具疏事覆前後所取人遍問其家並符合焉後八年得時疾死

述異記

輿國縣志

卷四十六

雜記

二

虔州平固人訪其親因留宿夜分聞寢室中有人語聲徐起聽之乃羣鶩語曰明旦主人將殺我幸善視諸兒既明客辭去主人曰有鶩甚肥將以食子客具告之主入於是止殺自後舉家不復食鶩

稽神錄

鍾紹京為中書令薛稷諷使讓因入言於帝曰臣本胥

史素無才望今特以勲進師長百僚恐非朝廷其瞻之

美帝然之遂許紹京改戶部尚書

新唐書薛稷傳

大玉草書字直一百五字乃敵一行行書三行行書敵

一行真正偏帖則爾至如樂毅黃庭太師箴畫贊累表告誓但得成篇即為國寶不可計以字數或千或萬惟

鑒別之精粗也他皆倣此近日有鍾尚書紹京亦為好事不惜大費破產求書計用數百萬錢惟市得右軍行書五紙不能致真書一字崔張之跡固乃寂寥矣惟天府之內僅有存焉

唐張懷瓘書估

襄州遍學寺禪院碑黃門侍郎修國史韋承慶撰太子少詹事鍾紹京書開元二年立紹京景龍中以苑總監從討韋氏有功性嗜書家藏王羲之獻之褚遂良書至數十百卷以善書直鳳閣武后時榜諸宮殿明堂及銘九鼎皆紹京書也其字畫妍媚道勁有法誠少與為比然今所見特此碑尚完尤為可愛玩也遍學寺於宇文

興國縣志

卷四十六

雜記

三

周為常樂寺於今為開元寺

南豐類稿金石錄跋

黃素黃庭經一卷是六朝人書絹完並無唐人氣格縫有書印字是曾入鍾紹京家黃素縝密上下是烏絲織成欄其間用朱墨界行卷末跋台仙二字有陳氏圖書字印及錢氏忠孝之家印陶穀跋云山陰道士劉君以羣鴛獻右軍乞書黃庭經此是也予跋云書印字唐越國公鍾紹京印也

米芾書史

唐越國公鍾紹京書千字文筆勢圓勁在丞相恭公孫陳弁處今為宗室令穰所購諸貴人皆題作智永予驗出唐諱闕筆及以遍學寺碑對之更無少異大年於是

盡翦去諸人跋予始跋之同上

劉御史燾云寶章集題者小字乃鍾紹京書予云紹京

碑今有存者蓋師薛稷也東觀餘論宋黃伯思與劉無言論書

鍾越國公為太傅十世孫號小鍾家藏二王真蹟數十

百卷是為吾豫章書家之宗越公興國人距予家不百

里予搜求一字不可得萬歷丙午董太史思白贈予戲

鴻堂帖有越國楷書爾時世尊遊舍衛城帖一百七十

五字又有唐揚越公書維摩經六十字實得右軍筆法

乃知小鍾之名良不虛傳郭子章題戲鴻堂越公楷書

鍾令公紹京楷書五帝靈飛六甲經一卷字畫道美清

興國縣志 卷四十六 雜記 四

潤妙得鍾王楷法非後人所及至今歷世寶玩之尹直題鍾

紹京墨蹟

唐襄州遍學寺禪院碑開元二年鍾紹京書在襄陽府

治于奕正天
下金石志

唐靜禪方攢碑鍾紹京書在西安府同上

唐臨池禪院四大字鍾紹京書在贛州府同上

唐鍾紹京洗硯池在贛縣舊學宮內即泮池也贛郡謝志

漳浦梁山有大峯十二唐鍾紹京作懷恩尉時增二十

四合三十六吳偉明詩梁山重回首翠峯三十六是也

諸志皆稱大峯十二紹京改為二十四漳浦縣志

鍾紹京開元初謫懷恩尉懷恩開元中置後省入漳浦故無知之者紹京在懷恩事蹟無考前志稱梁山古有十二峯紹京增其名爲二十四又中峯巖舊有紹京詩今亡當亦放廢間盤桓巖壑者乎同

李君行先生之學專以經書論語孟子爲正舍此皆不取如七世之廟可以觀德則專守七廟其他言廟數不同者皆無取也昊天有成命郊祀天地也則是合祭天地無疑也其言南北郊其言圜邱郊禘異禮皆不取也其學簡而易明以行己爲本不爲空言東萊公與叔父

舜從皆與之游

呂氏童蒙訓

興國縣志

卷四十六

雜記

五

李君行先生說武王數紂之罪曰郊社不修宗廟不享歷觀諸書皆以郊對社蓋郊者所以祭天社者所以祭地也南郊北郊五帝之類皆出於周禮聖人書中不見也嚴父配天之禮蓋始自周公若自古有之則孔子何得言則周公其人也列爵爲五分土爲三蓋至周始定若夏商以前俱如此則書爲妄也同

李君行先生說他每日常多只讀易書詩春秋孝經間讀孟子又言史書尚可最是莊老讀時大段害道同

東萊公嘗言凡衆人日夕所說之話如趙丈仲張諸公都無此話也衆人所作之事如楊公熈之李公君行諸

公都不做衆人做底事也

同上

李君行先生之長子格篤行博學克肖其父而長於四六表章早歲登科紹聖中知江寧府上元縣滎陽公知太平州李以啟事賀公其畧有云蘊命世之雄才賦經邦之遠器令問令望起韋平舊相之家嘉謀嘉猷翊舜禹重熙之代危誠獨立直己不回從容進退之儀挺達始終之節李尋以病不起學士大夫惜之

同上

李先之被謫南歸貧不自給新淦蕭建功爲築室江上以居之且割田以爲養朴死以女妻其子變人高其義

舊志

興國縣志

卷四十六

雜記

六

西昌陳一敬負義氣學爲文章傳道理所居竹數萬竿號竹林清隱平川大夫聞其賢辟爲學博士使者奉書幣就家起之西昌之大夫聞平川使者來曰吾邑之賢者不能舉顧令見舉於他邑之大夫吾何名爲邑卽躬詣其家請見狀其行義送於朝以爲荔波丞

楊士奇東里傳

贛守李彝建綠陰亭亭側有池池上竹森森蔽日王侍御奇題一絕句云創得幽亭近嶺梅綠陰名好稱仙才

四邊山色簷頭出一帶泉聲竹裏來

西江詩話

會稽姜一洪仕廣東左轄仙霞兵潰一洪奔贛州徒步至興國椰木村相隨止二僕枵腹足裂仰天嘆曰天

意有在偷生何爲遂赴水死諸生鍾國士哀之與榔木菴僧了緣棺斂之越一年乃歸葬

毛西河集

康熙十六年冬韓大任經過劫掠沴氣流染次年春二月大疫或舉村病無炊煙或合室死無收殮者居民時見白旗滿山聞喊殺聲皆以爲韓逆作祟知縣黃惟桂禱於城隍之神癘稜稍止

黃志

激濺二水交會處中有沙洲隆然者瑞洲也土人呼中洲壩相傳正德以前爲田百十畝佛祠民塋皆在焉有瑞洲樓壺天閣眺覽殊勝積漸衝決萬歷中何令應彪植檉柳數十以培之今所遺不及數畝春夏水潦盛時

興國縣志

卷四十六

雜記

七

浩然一碧冬涸架木爲橋以達於武塘

志林

上社之山曰東龕相傳鍾越國公讀書處舊有東龕禪寺久廢滕翰林賓唐令子儀有東龕十景詩昔摩詰輞川諸作東坡鳳翔八觀皆隨地緣情非有所拘限也近世凡州郡名勝登之志乘爲景非八卽十若必不可增損者而褊壤之一邱一壑且補苴牽綴以當其數抑固矣予作東龕記止就所見幽巖邃谷書之亦不可謂非

靈異之境

同上

東龕澗仄而流駛舊有虎溪橋以達於菴稍東北爲赤岡嶺有橋曰南筴吉郡通津也正德初皆圯適尹儀部

南山劉孝廉七星偕來邑中曾令選_指與遊東龕觴咏
日夕道赤岡覩兩橋而歎曰是予之責也夫澄塘民王
脩埕家豐於財聞令言遠詣觴所自任曾喜手酌酒勞
之遂鳩工壬申之夏兩橋俱成安吉州牧永豐曾昭爲
之記_{同上}

荷樹陂一名逕口李秘書監朴故里也秘書宋史有傳
爲伊川所重自有虔州以來第一人物有章貢集二十
卷文獻通考所錄而舊志不之及贛郡志載李謙白雲
居士集今亦無考裔孫存敬明英宗時輸穀賑饑詔旌
爲義民建勅書閣今閣址猶可辯識_{同上}

興國縣志

卷四十六

雜記

八

厓石砦營房在山之麓康熙己未撫定閩孽後以遊擊
府駐防其地壬戌後易以把總仰睇厓石絕壁精鐵萬
仞崔嵬賊窟兵欄歷歷在目來從蕭公嶺迤邐至止溝
澗畦町當日轉餉宿兵之路從行者喜稱述之_{同上}

蓮塘至扁橋中途有瀑布懸厓數仞冬夏不竭土名跌
水砦言其自上墜下也赤坂洲舊轄興國嘉靖壬辰與
永豐爭蜈蚣山址督郵爲之攘臂焉議割地十餘里界
之今以扁橋爲界_{同上}

竹壩平疇數百頃相傳始建縣時擬卜其地衡上之輕
重較西涯爲輕故不用_{同上}

縣治舊有三程過化坊構木爲之今不復存予於其址築屏牆存漢唐郡縣梁恩之體礮石鐫三程過化四字內嚮外嚮鐫古平固縣四字皆裘廣文吉光書也左有五嶽真形圖古碑一明洪武初年建右爲浮繫之所名之曰倉 國朝康熙丙戌憲臣周清原請徧廢天下倉舖羈禁遂廢同上

儀門外地頗敞朗臨麗譙之陰烏柏二株大皆合抱臃腫盤鬱迤右古柏一株幹如青銅數百年物也丁亥戊子鵲巢其上過者作詩紀之予添植一柏於旁而更植二松於左以相對待門左題名記碑嘉靖丙寅唐令希

興國縣志

卷四十六

雜記

九

臯立右修復譙樓記碑萬歷壬寅何君謨立左角門舉廢記碑正德己卯黃君泗撰立官置公田記碑萬歷乙卯吳嶼梅立題名記謝方伯詔修贛府志據以作興國官師考予閱舉廢記而爲黃君補立傳焉角門左三楹爲土地祠往例鞭春於此予採劍南句爲聯曰簫鼓追隨春社近衣冠簡樸古風存同上

縣廳事俗皆曰正堂清丈田糧碑一萬歷壬午易令道源立是年中丞王公宗載撫江右疏請覈浮糧丈田畝以甦民困故奉而勒石上中下科則官民塘地荒熟寡皆具東廡後題名記碑予所撰立也同上

邑中邇年屢產芝丙戌之夏二莖丁亥春一莖皆在仙
女潭石上山僧遊士採之以歸辛卯春一莖在干田嶺
首得自蕘童皆紫色大僅如錢如兒拳蓋芽蘖未堅粟
者已丑盛夏發於官署之桑本卽方竹山房左傍舍隙
地也桑童童數仞碧蔭侵雲芝始生如蓓哘經歲漸長
至庚寅大如槃盂徑二尺許下爲重臺皴紋波瀾色若
蒸栗於是南豐布衣湯永誠安福孝廉顏傳爲詩賦以
張之

同上

陳坊有里王廟祀陳武帝武帝嘗爲廣州江州刺史頓
兵南康南康者贛也故贛屬多祀之比諸隋煬帝祠爲

興國縣志

卷四十六

雜記

十一

近理矣坊之名陳或亦以廟故云

同上

予至興訪上洛山所在士夫父老未有曾登其地者第
指西江之右龔公山之左謂上洛在焉旣親造搜核岡
嶺紆互無從閱實西江邑中土名在儒林鄉縣志稱上
洛山在大足鄉道里不符木客之詩酒盡君莫沽云云
唐詩話云嘗自稱太上隱者偶來松樹下之句亦其所
作南康志又以爲山都之詩酉陽雜俎山都有鳥都猪
都人都三種夔龍罔象之屬也木客避秦隱居得仙當
與毛女桃源洞人爲伍而竟以魑魅例之又考吳越春
秋越有木客邛勾踐使工人伐木獻以久不得歸工人

憂思作木客吟則木客越人而非秦人木客吟亦非沽酒詩矣好事傳訛今古類然存之以廣談助可也同

元常士季舊稱大小鍾至可大而復號小鍾由工書得名武后時明堂九鼎諸宮殿榜皆其所署意其聲望位置當在歐虞褚薛間及考李嗣真書品張懷瓘書估以逮宣和書譜皆不列惟竇泉述書賦有萃傅巖而匯穎川之句懷瓘則有鍾尚書破產求書之說米元章晉名家真蹟皆以鍾紹京書印為據則越公當日固以精鑒富有為長若其揮毫落墨猶未得遽登神妙也歐公集古錄未嘗一及之至南豐始盛推遍學寺碑元章亦稱

輿國縣志 卷四十六 雜記 十一

趙大年所購千文黃長睿又稱寶章集題小字書蓋唐人墨寶至北宋而日就彫落不得不珍其所少又士大夫之藏弄稍下於御府之秘儲故棄取異同云爾于司直金石志又列靜禪方積碑臨池禪院二條禪院乃贛州土物也予過虔屢詢遺蹟不得其處再閱贛州府贛縣二志亦並無所謂臨池禪院者嗟乎中郎不作則願對虎賁况韓幹之馬未必不與曹霸等重哉望古遙集

睠言顧之同上

永豐曾侍郎榮微時嘗販豸豸往來興邑偶犯夜為邏者所拘里中方濬魚池臨池為訓蒙館館師出對句云

地旁去土加三點成池衆徒莫對榮應云囚裏出人遇
一王興國衆皆賞歎爲具禮遣之上同

營前江氏當宏正承平時累世饒財好施予王府審理
廷振建玉皇閣登真大殿三清金容兩壁萬神朝帝像
又爲普惠上下觀天王閣大乘寺之圓通殿靈山寺古
佛像於文廟起經閣兩廡於縣廳立思莊樓管前溪徑
環窄春夏病涉者多乃買山鑿石別通之以達於其家
族人鳴霄於瀧下水造大橋長三十六丈濶一丈八尺
計費三千七百余金米一千八百九十石繡梓道釋藏諸
品真經正副一百八種印施十方鳴霄子石泉構挹秀

興國縣志

卷四十六

雜記

七

書院於安湖故址仰二程之遺風嘗重修大乘寺作登
真水星閣施杉木三千五百大皆合抱值冬月水涸工
期既定木不能下一旦迅雷巨雨溢漲推涌聚春口壩
若有神助此營溪江氏世德堂記中摘錄語也託名於
海剛峯所作嘉靖四十三年刻藏於家其僞撰不足辯
而事蹟未必盡誣今邑中之能識舊事者鮮矣錄之猶
有袁廣漢卓王孫之思焉上同

太平鄉崇賢里有山民戶 國初兵燹土曠人稀流遺
爭集閩廣之僑戶自爲黨類勢遂張來自柳連間者相
率攬而狐之號爲山野子其人多雷藍畢三姓占耕其

土自爲婚媾不敢出里巷既久力農蓄積屬籍輸賦邑人之狡者籠其田於己籍中而蝕其盈羨遇有逋糧輒歸之山民官欲爲清釐不可得也甲寅寇孽旣平某巡簡指爲餘盜負固欲請兵禽獮之乃號哭泥首丐死而畏匿益甚鄰郡皆哂興邑山民爲異類與猺獍狼黎比黃君惟桂始誘化之俾自立戶黃去則仍匿迹詭寄籠田之徒愈恐喝使不敢出又二十餘年予因編冊審丁廣爲勸諭按戶覈其詭寄重懲之三閱月始就釐正削去山民之名與土著一體有名之丁悉造庭聽唱魚貫拊踴蓋邇年來其人固益馴習曉暢就其初特爲奸民

興國縣志

卷四十六

雜記

三

所愚豈真狂野鹿哉予之術非有加於黃君不過踵而行之但黃君著治興異蹟作山民圖園目駛舌出入必挾刃婦稚皆能搏生與予所見大有逕庭焉同上

邨民會起周等五人以閩來客戶趙如瞻父子蓄蠱致毒具控視其人疋羸躑躅語塞氣奄依方法以礬生豆桐子試啗之安然無嘔噦續控者又三人五人者助如瞻昇榨油具如瞻具膳饗之食下咽若螫隨腹痛歸而病三人則偶過如瞻之門飲其茶與煙或食桃喉腹痛相同如瞻之傭曰吳老六先嘗貸子錢於起周病往靳之曰若能癒我疾乎我死負不償矣吳遽曰同傭有楊

老六如瞻自汀攜來可得其藥乃釀錢賂楊楊竊藥與之下蟲數枚長半寸餘白色口如針而青病稍間乃相率俾父兄弟舁負奔控謹傳達於鄰境自旅店酒肆煙館茶亭行者忍饑渴不敢飲食而黠民之挾仇者因以誣其所憎蠱牒紛然二備先遁嚴緝獲吳於粵都境中鞠之言蠱有三曰瓜蟲蛇也瓜蠱下物爲瓜形大如棗栗蛇蠱爲蛇形與虬蟲鬚蟲蠱小於蛇而數多八人所中乃蟲蠱也藥用剪刀交草雞脊柴烏柏根雞脊柴者畝澮間積潦所生贛地多有惟剪刀交草造蠱之人攜種自隨如瞻常植於家事發被逮卽焚刈不可見

興國縣志

卷四十六

雜記

古

矣邑民有陳錫卿者少嘗中蠱於汀遇異僧得活受其方轉治人多效使治此八人復下蟲倍於前調養經月乃霍然其方則白頭翁獨脚蓮透骨硝以酒和雞煮而陷之復搗巴豆末半酒蒸半生丸如梧子服藥後腹絞痛暈絕復蘇則以丸與之蟲皆自斃而出如瞻父子當庭鞠時萬衆聚而唾其面怡然自若吳備更起而質之三木關其脛終不承乃達上僚由府及臬以律重礙入告適如瞻病殞遂歸獄焉以不知情貫其二子驅之歸籍按蓄蠱之害見於衆家雜說不一而足律文列之於十惡不道皆以爲嶺表異俗使然而不知嶺北風氣漸

染若此前令何震嘗治斯獄時蓄蠱者丁姓非刑榜掠不承爲僞供以達府府反其獄邑人至今恨之予終以窮於讞決抱愧吾民錄此以傳治蠱之方與記載傳聞迥異俾遠適殊域者遠害自全可也

同上

贛壤鄰接閩廣語言文字多與相類筆畫之異華爲華鄰爲僛茲爲茲臨文刻本皆然也全字皆訛者鑽爲闌誘爲嘽誑爲陰帳爲賬賠爲賤賤字說文同朋比之比而以爲賠累之賠斂字正字通曰用力舉物此間以爲壓制之義仝音軒亦軒舉之義此以爲坑谷之坑不本音臬芽枿也此以爲墩鎖之墩又稱水道曰圳字書所

輿國縣志

卷四十六

雜記

五

無稱水石相際爲際見之象山集中則土語而文人旣用之矣有義同而移其音者恆爲常汝爲爾也有義同而殊其用者喚爲喊走爲行也有混而不分者飲酒爲食酒也有倒用爲義者辭客曰請任非延之而款於室乃却之使不入於門也自餘儒爲而仁爲羸輝爲非胡爲巫馮爲洪荒爲方昏爲分入爲亦音韻之訛不可枚舉官司牒狀江浙曰勢宦曰劣衿此則曰閹宦曰喇員民俗交關江浙曰議曰帖此皆曰字獄訟息和曰調停此曰做中情事關說曰居間此曰來去人房屋間架吳下曰幾進燕京曰幾層此曰幾棟僦屋之稱吳曰租燕

曰賃此曰稅米穀用斛用斗此間用桶用籬算田以畝
爲則天下通行此乃以租糧爲則糶糴以米穀爲則此
乃以銀爲則方言土俗隨遇不同姑就所見於興國一
邑者疏之亦可概嶺北之大凡云同上

書圍高不過八尺庖者七尺縱廣如之正方如笈笥四
匡皆木而編以竹前爲疏櫺糊以白紙明淨宜人中置
小榻坐卧皆在焉其半容一几挾兔園冊子日夕咕嗶
其中凡古廟荒刹公廨隙宇同學及授徒者相聚而據
之排比如櫺邑中之勤學者盛暑皆能夜坐哦聲遠傳
聽者忘疲與古人青燈竹屋紙帳梅花風味頗類爾彼

興國縣志

卷四十六

雜記

六

較華睨矣予嘗語諸生圍與帷同音董子之所下者非
歟曰非也俗多土圍故襲其名耳曰若土圍厓容一人
則袁宏之室古亦有之矣而未覩二三子之雞棲於枳
虎弭於桺也皆大噓同上

興國俗儉陋民間昏暮或不用燈燭斧松栴燃之明如
列炬名曰松光予嘗行邨落夜歸亦用以引路陸深燕
閔錄云深山老松心有油如蠟山西人多以代燭謂之
松明不畏風戴石屏詩松明夜當燈同上

自東邨緣溪行數里山高路隘攀援而進其險峻處怪
石崢嶸不成步武又有深壑危橋過者無不戰慄如是

者三四里有巨石特立如華表高二丈圍可數尺大樹倚之頗堪愛玩又前一二里白石臨流方正可坐數人天然釣臺也嚴陵遺蹟在富春山上離水百尋無投綸之理此地乃爲名稱其實損持於石壁上鐫釣臺二大字千百載後當以張公得名但損持方爲循吏與高蹈不侔耳

陳狷亭南遊日記

北門外由大街直上爲大井頭臨井有太子廟里人每歲值端節迎神據井不汲夜則燃燈數百晃照通衢孔志齊分會姓族繁其故老言宋時有會攀龍者嘗從事文信國因戰被創家居寇相戒不入其境所全甚多同上

興國縣志

卷四十六

雜記

七

大足鄉鍾于千幼失怙遇母病藥不效或言斑鳩可療時居嚴寒徧覓弗獲于千號泣於天適有一鳩飛集庭前取以噉母病遂愈聞者異之同上

康熙五十二年癸巳九月衣錦鄉頑佃李鼎三煽惑閩廣流寓劔田骨田皮許退不許批之說統衆數千赴縣門挾長官要求勒石著爲例羣奸一時得志劔爲會館遠近傳關每居有秋先倡議八收七收有差田主有執原額計租者卽號召多人碎人屋宇并所收租攫入會館罹其害者案山積雍正四年會孝廉霖因佃林其昌踞耕告於官其昌乘其赴試率黨黃用章等爲伏俟其

過毆辱之極窘經控前撫憲邁批飭嚴究焚拆會館追
毀傳關懲犯遞籍餘黨悉斂有田之家稍得安堵霖出
鍾生肖侃門下鍾爲予言之猶色變今數十年來德威
所揚訖上下辨而民志定頑梗無自逞矣同

乾隆壬戌邑大水見一獸頭角嶄然每搖首噴鼻則水
長數尺羣譁曰此水牛精也識者知爲蛟云同

癸亥夏四月邑大饑訛傳有神女降指某處土可療饑
一時愚民負筐擔囊挖取食之邑人有詩記之曰可憐
爭取充枵腹老幼相隨荷篠歸然食之終不宜人同

乾隆庚午重修邑志土寇宋朝宗之裔孫啟龍呈稱伊

興國縣志 卷四十六 雜記 六

祖宋震山嘗充當鄉勇受過都司守備職銜請載志乘
邑人謝大騞聞之奮然曰宋朝宗之爲叛逆戕害官民
前志確鑿可據其于震山雖就招撫仍受吳耿二逆僞
劄與崖石諸寇相通流毒鄉里豈應蒙混入志遂陳狀
力辨邑侯孔公嘉其持論侃侃竟從其議宣示志局明

經呂世璜嘗作序以美之衢廳紀聞

張損持太史以翰林出宰興國邑之名山勝境題咏殆
遍間作楹帖以誌雅懷如江東廟云古檜有風天自籟

石壇多露鶴爭皞採蘇滄浪句治平觀云丹爐芒屨存疑信

碧甃寒泉自古今城隍廟云明有人幽有鬼青螭赤豹

而臨吾土莫非忠信之長慈惠之師迪則吉逆則凶黃
蕉丹荔以答神庥庶無水旱之災妖孽之疾明倫堂云
啟堂構於百年榛穢之餘細桷大栭願嗣先民矩矱振
禮樂於奕葉銷沉之日東罍西鼓式提後學盲聾又云
釋奠釋菜列俎豆而求南面之肇裡則昔年純正遊焉
誰謂此邦無國故傳指傳薪溯源流而衍西江之遺派
惟今日歐會往矣依然薄海誦家言又曰教亦多術矣
請蔽以一言惟曰精於勤荒於嬉文不在茲乎緬懷夫
萬古何啻習其人得其志尊經閣云誦九經而稔衆說
之蕪尊聞者其叩鐘以待瞻數仞而識百家之卑景行

興國縣志

卷四十六

雜記

七

者須拾級以登譙樓云遠極千里之目俾窮民隱無弗
陳高置百尺之身知老子興仍不淺又集唐人盧綸武
元衡句云川原繚繞浮雲外城闕參差茂樹中縣廳事
云欲壽欲富欲安欲逸務俾各得其所熙熙若躋春臺
言義言孝言敬言悌何由不肅而成蕩蕩咸遵王路又
云應山貧海罄之徵求祿位升沉都已置之度外止是
居官一日須殫心一日處嶂密箐深之風會文章教化
豈得盡如意中但看善俗幾條卽力學幾條寅賓館云
何人更結王生鞅過客難忘謝朓樓集許渾李白句牧愛堂云
同永叔夷陵之謫文章政事兩難誇稟晦翁蠡洞之規

誠正修齊皆可學

皆山筆記

前令黃之麟題縣廳事云朝廷許多供賦從百姓中來尤宜存恤一一天下極難事體至縣官而止直須忍耐萬千前令黃木菴題譙樓云登躋望山河百里烽煙乃一旦雲收霧霽憑臨看蔀屋十年蹂躪幸今朝戶誦家絃皆為張損持太史所賞取載之澍水志林太史又取韓致堯句題海公祠云狂思海上醫龍病危欲山頭捋虎鬚余遊興國拜海公祠尚親見之蓋太史手書也是日又過西山許真人廟廟係近年創建楹聯殊少佳者余得句云循吏作神仙澤流民物真人本忠孝道在子

興國縣志

卷四十六

雜記

三

臣以語同遊黃君映文黃君遂鐫之於木今懸廟中上京師贛寧會館舊名贛郡會館相傳國初時為他人所踞王眉長宗伯極力清理始得復還舊觀故館中立宗伯神主以酬其功顧余疑宗伯係康熙二十一年進士郡人官京師者固自宗伯始然考順治十一年以後郡中科目頗不乏人會館係公車稅駕之所豈前此竟無一人議及耶逮余過興國得宗伯裔孫所藏當時合約一紙乃知順治十二年郡人會鳩貲三百金向贖尚少五百金康熙二十二年宗伯官翰林捐銀三百兩再贖仍少二百金會館譜敘作於康熙三十六年泛言贖

貲收贖據此紙則宗伯捐銀三百兩外郡人前後曾兩次贖金也

同上

越國公洗硯池或謂卽今府學泮池與邑士子屢欲濬治以存越國公遺蹟旣而考蕭相經街菴記知洗硯池在大佛寺卽古景福寺故道光二年九邑士子議新郡學邑人江瀾建東廡黃上軒黃敬熙鍾登士建西廡黃上軒又建府學魁星閣無議及濬泮池者知其非越國公故蹟云

同上

謝征蠻所冠鐵兜鍪舊傳在其鄉中或指石臼之形似者當之張損持太史斥爲妄說余意故老必有親見鐵

輿國縣志

卷四十六

雜記

三

兜鍪者因以石臼擬其形狀耳今土人謂石臼有二一砌深塘塹中一半沒於路口土中不敢動動則祟人此則捫燭扣槃之見矣

同上

三寮羅經石相對有山巉巖高數十仞山麓有洞好事者持炬往遊約可三里許怪石林立其稍平者如床几鼎彝之屬其最突兀者作奇獸攫人狀令人毛髮森豎洞之底有泉淙淙作響蓋梅水丁有美所記如此張損持太史道里考所謂羅經山配以吸石洞者卽指此處惜未表而出之使與萬礫龍泓並有千古

同上

寶城鄉三陽礫有石高五尺許斑剝陸離酷肖蟾蜍蟾

蝮俗名蚊蛤因謂之蚊蛤石暑月坐石下絕無一蚊距石數十武則羣飛轟轟矣可見石燕能飛石蠃能行實本造化自然假令以人工鑿成必不能致此奇異同上竹管洞石印坊溪流湍急不可築陂陂成則雨立至土人於大旱之年壘石壘土以試之果大雨因恃爲旱歲禱雨之法名其地曰龍陂同上

康熙二十年崖寇初平草茂人稀邑多虎患縣令黃木菴爲文祭之虎渡河去諸生黃邦任作詩紀事邦任字愚菴灘上人余晤其裔孫敬熙敬熙時年八十爲余述邦任生平事甚詳因得讀其所作紀事詩或疑祭虎渡

興國縣志

卷四十六

雜記

三

河近於緣飾抑過矣同上

嘉慶十年乙丑平川獲鯉魚大數十觔道光二年壬午又獲之大如前前所獲邑人指爲蕭炯齋太史成進士入詞垣之兆後所獲邑人指爲謝君福基劉君全周同成進士之兆謝今官戶部主事劉官侍衛同上

跋

興國縣志自道光甲申經蔣明府續修距今四十餘年
庚午春重修省志奉 劉中丞檄令各屬續修縣志送
局以憑採入崔明府以名進士出宰興邑適任其事時
藍太史激江掌教聘入纂修鴻掌教濂溪相離較遠以
不克常川在局屢辭弗獲於是郵筒來往時相摺焉
夫承平日久民不知兵而其間奮勇之氣一觸發而莫
能遏抑詎教之有素歟抑本性然也我邑僻處巖疆素
稱質樸不尚詐巧當咸豐三五年六七年間粵匪猖獗
三面鄰邑被其蹂躪該匪疊次來撲縣城並擾東北西
興國縣志 跋一

鄉各境鄉民聚團聯堡自備貲糧各置器械鄉紳爲之
統率一聞有警爭先堵殺勇氣百倍孤城鄉堡得保無
虞而其間忠毅之士臨難捐軀亦復不少事經
上聞疊蒙褒美此亦見我鄉民志切同仇守望相助之
一義也志中故於武事及忠孝節義敘次較詳餘多仍
舊新增者十僅四五是役也崔明府才贍學博廣益集
思縵鄉太史主裁其間而又得分修諸君子贊襄之力
且尤可幸者經費浩大又有總戎韓君萬生慷慨仗義
費出不貲弁邀諸同志勸金集成故閱數月而書告竣
鴻不揣固陋因綴其大要而跋數言於簡末時同治辛

未重秋月也

邑人鍾音鴻謹跋

附載諸同志姓氏於后

韓開文堂

卽

誥贈建威將軍朝魁

韓進春

字萬生記名提督

鄒勳遠堂

卽

誥贈通奉大夫漢倬

鍾音鴻

字子賓湖南辰沅永靖道

黃興賢堂

卽

誥贈朝議大夫偉猷

藍拔奇

字縵鄉翰林院編修

王殿魁

例授都司

鍾啟祥

候選州同加二級

興國縣志

改二

邱能澂

候選州同加一級

陳國彪

候選縣丞

陳桂芳

例貢生

謝茂佳

例貢生

吳品和

例貢生

